

四庫全書

子部

欽定四庫全書

子部
冊府元龜卷
二百九十九
三百

詳校官中書_臣王鵬

員外郎_臣牛稔文覆勘

總校官庶吉士_臣何思鈞

校對官助教_臣羅萬選

謄錄監生_臣倪景寬

欽定四庫全書

冊府元龜卷二百九十九

宋 王欽若等 撰

宗室部

專恣

害賢

禍敗

專恣

傳曰專命則不孝書曰縱敗禮斯皆惡之大者焉若夫聯
暉帝裔託體皇極宜乎念肺附之重遵磐石之訓保厥土
宇作為屏翰其有志戒策之訓背師傅之教窮滋味之好

極游觀之美昧稼穡之理重私嬖之欲以至不式王命廢
亂典常虐用下民暱愛近習殘賊不道崇侈無厭于有司
之議抵王者之禁至於幽廢誅削而不悔焉於戲魯哀有
言謂罔知乎憂懼仲尼立教俾深戒乎性習者良可述夫
漢陽丘侯偃景帝四年坐出國界耐為司寇

常山憲王舜景帝少子驕淫數犯禁

膠西于王端數犯法漢公卿數請誅之景帝弗忍而端
所為滋甚

廬江王賜以邊越使使相交

邊越者邊界
與越相接也

濟川王明武帝建元三年坐殺中傅廢遷房陵

濟東王彭離武帝時坐殺人廢徙上庸

臨江愍王榮坐侵廟墮地為宮自殺

江陽侯仁宣帝元康元年坐役使附落免

祝茲侯延年棄印綬出國免

廣陵厲王胥動作無法度

南陵侯慶坐為沛郡太守橫恣罔上下獄疾死

長沙刺王建德宣帝時坐獵縱火燔民九十六家殺二人以縣官事怨內史教人誣告以棄市罪削八縣

廣川王去本始三年坐悖虐聽后昭信讒言燔燒烹煮生剖剝人距師之諫殺其父子凡殺無辜十六人至一家母子三人廢徙上庸去道自殺

東平思王宇元帝初就國壯大通奸犯法

後漢楚王英光武建武十五年封英少時好游俠交通

賓客

東海靜王政明帝時中山簡王薨政詣中山會葬私取簡王姬徐妃又盜迎掖庭出女豫州刺史魯相奏請誅政有詔削薛縣

濟南安王康在國不循法度交通賓客後人上書告康招來州郡姦猾漁陽顏忠劉子產等又多遺其綿繒帛按圖書謀議不軌事下考案削五縣

趙惠王乾安帝時坐白衣出司馬門削中丘縣

王宮門有兵衛

亦為司馬門東觀記曰乾私出國到魏郡鄴易陽止宿亭令奴金盜取亭席金與亭佐孟常爭言以刃傷常部

吏追逐乾藏逃金絞殺之懸其屍
道邊樹相國舉奏詔書削中丘縣

河間惠王政傲狠不奉法憲順帝以沈景為相國謁王
王不正服箕踞詔書讓政

魏任城王楷坐私遣官屬詣中尚方作禁物削縣二千
戶

臨淄侯植嘗乘車行馳道中開司馬門出太祖大怒

彭城王據明帝景初元年坐私遣人詣中尚方作禁物
削二千戶

東平靈王徽青龍二年使官屬搗壽張縣吏為有司所
奏詔削縣一戶五伯

趙王幹私通賓客為有司所奏

東海定王霖性麤暴閨門之內婢妾之間多所殘害

吳齊王奮居武昌廢帝初諸葛恪不欲諸王處濱江兵
馬之地徙奮於豫章奮怒不從命又數越法度

晉竟陵王楙都督兖州刺史在州徵求不已郡縣不堪

命

東安王繇誅楊駿之際屯雲龍門兼統諸軍是日誅賞
三百餘人皆自繇出東夷校尉文倣父欽為繇外祖諸
葛誕所殺繇慮倣為舅家之患是日亦以非罪誅倣

彭城王玄會庚戌制不得藏戶玄匿五戶桓溫表玄犯
禁收付廷尉而宥之

通吉亭侯勲領西戎校尉為政暴虐至於治中別駕及
州之豪右言語忤意即於坐梟斬之或引弓自射西土
患其凶虐

譙郡王文思性凶暴多殺弗辜好獵燒人墳墓數為有司所糾

會稽思世子道生性踈躁不修行業多失禮度竟以幽廢而卒

宋彭城王義康以大將軍領司徒辟召掾屬義康素無術學闇於大體自謂兄弟至親不復存君臣形迹率心逕行曾無猜防私置僮部六千餘人不以言臺四方獻饋皆以上品薦義康而以次者供御文帝嘗冬月噉柑

歎其形味並劣義康在坐曰今年相殊有佳者遣人還東府取大相大供御者三寸

竟陵王誕文帝子孝武性多猜頗相疑憚而誕造立第舍窮極工巧園池之美冠於郡縣多聚才力之士實之第內精甲利器莫非上品

武昌王渾少王而凶戾嘗出石頭怒左右人拔防身刀斫之後為中書令裸身露頭往散騎省戲因彎弓射通直郎周朗中其枕為笑樂出為雍州刺史至鎮與左右人

作文檄自號楚王號年為元光元年備置百官以為戲
笑

海陵王休茂性急疾欲自專司馬庾深之每禁之常懷
忿怒

南郡王義宣鎮荊州十年兵強財富既首創大義威名
著於天下凡所求欲無不必從朝廷所下制度意所不
同者一不遵承嘗與孝武酒先自酌飲封送所餘其不
識大體如此

江夏王義恭鎮彭城魯郡孔子舊廟有栢樹二十四株
經歷漢晉其大連抱有二株先倒折士人崇敬莫之敢
犯義恭悉遣人伐取父老莫不歎息後為太宰錄尚書
事領丹陽尹侍中義恭遊行或三五百里孝武恣其所之
東至吳郡登虎山又登無錫縣烏山以望太湖

晉平王休祐狠戾強梁前後忤明帝非一在荊州時左
右范景達善彈碁帝召之休祐留不遣怒詰責之曰汝
剛戾如此豈為下之義

南齊廬陵王子卿為荊州刺史在鎮營造服飾多違制
度遷南豫州刺史之鎮道中戲部伍為水軍武帝聞之
殺其典籤徵還

魚復侯子響初為輔國將軍豫章王嶷無子養子響既
出繼車服異諸王每入朝忿怒拳打車壁後為荊州刺
史數在齋內殺牛置酒與左右聚樂令內人私作錦袍
絳襖欲餉蠻交易器仗

梁邵陵王綸為揚州刺史綸素驕縱欲盛器服遣人就

市賒買錦綵絲布數百疋擬與左右職局防閣為絳衫
內人帳幔百姓並關閉邸店不出臺續使少府市綵經
時不能得勅責府丞何智通具以聞因被責還第恒遣
心腹馬客戴子高戴瓜李撤趙智英等於路尋目智通
於白馬巷逢之以槩刺之刃出於背智通以血書壁作
邵陵字乃絕遂知之武帝懸錢百萬購賊有西州遊軍
將宋鵲子條姓名以啟勅遣舍人諸曇粲領齋仗五百
人圍綸第於內人檻中禽瓜撤智英及子高子高驍勇

踰墻突圍遂免瓜等智通子敞之割炙食之即載出新
亭四面火災之焦熟敞車載錢設鹽蒜顧百姓食撒一
鬻賞錢一千徒黨并毋肉遂盡綸鏢在第舍人諸彙聚
并主帥領仗身守視免為庶人

豐城侯泰為譙州刺史江北人情獷強前後刺史並綏
撫之泰至州便遍發人丁使擔腰輿扇繖等物不限士
庶恥為者重加刑多輸財者即放免之於是人皆思亂
及侯景至人無戰心乃先覆敗

後梁河間王岑位至太尉性簡貴及後王嗣位自以望重屬尊頗有不法

陳南康王方泰為都督豫章郡諸軍事豫章內史在郡不修民事秩滿之際屢放部曲為劫又縱火燒邑居因行暴掠代至又淹留不還

武陵王伯禮為雲旗將軍持節都督吳興諸軍事吳興太守在郡恣行暴掠驅錄民下逼奪財貨前後委足百姓患之

始興王叔陵為揚州刺史治在東府事務多關涉省閤
執事之司承意順旨即諷上進用之微致違忤必抵以
大罪重者至殊罪死道路籍籍皆言具有非常志

長沙王叔堅為驃騎將軍時後主患瘡不能視事政無
大小悉委叔堅決之於是勢傾朝野叔堅因肆驕縱事
多不法

會稽王莊性嚴酷年數歲左右有不如意輒剗刺其面
或加燒爇

後魏清河王紹道武長子兇狠險悖不遵教訓好輕遊
里巷劫剝行人斫射犬豕以為戲樂

樂浪王萬壽孫長命襲爵坐殺人賜死國除長命子忠
孝明時復爵為太常少卿出帝泛舟天池忠著紅羅襦
繡作領碧紬袴錦為緣帝謂曰朝廷衣冠應有常式何
為着此百戲衣忠曰臣少來所愛情存綺羅歌衣舞服
是臣所願帝曰人之無良有至於此

安樂王長樂為定州刺史頓辱衣冠多不奉法百姓詣闕訟

之孝文罰杖三十

廣陽王深孝明帝時為常山刺史在州多所受納政以
賄成私家有馬千匹者必取百匹以此為常

濟陰王誕為齊州刺史在州貪暴大為人患牛馬騾驢
無不逼奪家之奴隸悉迫取良人為婦有沙門為誕採
藥還見誕問外消息對曰惟聞王貪願王早代誕曰齊
州七萬家吾來一家未得三十錢何得言貪

元麗為雍州刺史為政嚴酷其妻崔氏誕一男麗遂出

州獄死囚及徒流案未申臺者一時放免

元又先納靈太后妹為室孝明帝初太后臨朝又為侍
中領軍既在門下兼摠禁兵深為靈太后所信委太傅
清河王懌以親賢輔政參決機事以又恃寵驕盈志欲
無限懌裁之以法又輕其為人每欲斥黜之令黃門胡
度等誣告懌置毒藥御食中殺之假為靈太后辭遜之
詔又遂與太師高陽王雍等輔政嘗直禁中孝明呼為
姨夫自後專總機要巨細決之威振於內外百僚重跡

相州刺史中山王熙抗表起義以討又為名不果見誅
又尋遷衛將軍餘如故靈太后與孝明讌於西林園日
暮還宮右衛將軍奚康生復欲圖又不克而誅是後孝
明徙御徽音殿又亦入居殿右既在密近曲盡佞媚以
承上旨遂蒙寵信出入禁中恒令勇士持刀劍自先後
公私行止彌加威防又於千秋門外厰下施木闌檻有
時出入止息其中腹心防守以備竊發人物求見者遙
對之而已自劉騰死後防衛微緩又頗亦自寬時宿於

外每日出遊留連他邑靈太后微察知之又積習生常無復虞慮其所親諫又亦不納

元謚除大司農卿遷幽州刺史謚妃胡氏靈太后從女也坐毆其妃免官後除都官尚書車駕出拜圓丘謚與妃乘赤馬犯鹵簿為御史所彈靈太后特不問

元和為東郡太守先是郡人孫天恩家豪富嘗與和爭地遣奴客打和垂死至此和誣天恩與北賊來往父子兄弟一時俱戮資財田宅皆沒官天恩宗族欲詣闕訴

寬以和人之親不敢告列

清河王懌弟悅為侍中太尉臨拜日就懌子亶求懌服
玩之物不時稱旨乃杖之百下

北齊上黨王渙與常山王演等築伐惡諸城遂聚鄴下
輕薄凌犯郡縣為法司所糾文宣戮其左右數人渙亦
被譴

安德王延宗為定州刺史以囚試刀驗其利鈍驕縱多
不法

隴西王紹廉兄紹義為清都尹未及理事紹廉先往喚
囚悉出率意決遣之

唐襄邑郡王神符為揚州都督少威嚴不為羣下所肅
後因入朝多將公解錢帛以供私費又令所在親昵統
軍知府留事太宗謂神符曰公解府官供有多取豈廉
潔耶且都督入朝在府長史以下官屬備具何緣別任
武人以為留守然以戚屬不之罪也

漢王元昌為梁州都督在州頗違憲法太宗手勅責之

初不自咎更懷怨望

滕王元嬰高宗時為金州刺史驕縱逸遊動作失度帝與書誡之後為洪州都督又數犯憲章

蜀王愔為岐州刺史愔常非理毆擊所部縣令又畋獵無度數為非法

越王貞高宗時歷揚州刺史都督相州刺史安州都督所在睚狎群小聽受讒言官僚有正直者多被貶退又放恣奴客侵暴部人繇是皆鄙其行

梁嗣廣王友諒繼歷藩郡多行不法

後唐秦王從榮為大元帥從榮乃請以嚴衛捧聖步騎
兩指揮為秦府衛兵自每入朝以數百騎從行出則張
弓挾矢馳騁盈巷既受元帥之命即令其府屬僚佐及
四方遊士各試檄淮南書一道陳已將廓清宇內之意
初言事者請為親王置師傅明宗顧問近臣執政以從
榮名勢既隆不敢忤旨即奏云王官宜委從榮乃奏刑
部侍郎劉贊為王傅又奏翰林學士崔稅為元帥府判

官明宗曰學士代予詔令不可擬議從榮不悅退謂左
右曰既付以元帥之任而阻予請僚佐又未諭制旨也
復奏刑部侍郎任贊從之

害賢

古者庶子之官實掌公族教之以孝悌申之以睦友然
後邦國有倫而衆嚮方矣夫本支之戚暱莫加焉茅土
之胙厚莫重焉榮祿寵章暉其顧盼膏粱紈綺充其嗜
好有能富而知禮高而思危固姻睦之親識為善之樂

者蓋云鮮矣矧自王政不綱懿親道廢麟趾之風缺棣
華之賦興小則席寵寢深恣陵蕩之志大則分封踰溢
萌負恃之心至使正士抗辭假尋斧於遺論忠臣發忿
翦滋蔓於禍基裁正所申舛望斯作惡直醜正怨天尤
人苟慘毒之所加殆夷滅而無類禍敗之始常必繇之
是用徵彼舊聞列其行事覆車之軌昭然可觀

漢梁孝王武與景帝皆竇太后所生景帝廢栗太子太
后心欲以梁王為嗣大臣及袁盎等有所關說於帝太

后議格

閣音

孝王不敢復言太后以嗣事後立膠東王為

太子梁王怨蓋及議臣乃使羊勝公孫詭之屬謀陰使

人刺殺袁盎及他議臣十餘人

吳孫緄堅弟靖之曾孫為侍中武衛將軍領中外諸軍

事廢帝太平二年朱異假節為大都督救壽春圍不解

還軍為緄所枉害

吳錄載緄要異相見將往乃陸抗止之異曰予通家人耳當何所疑乎遂

往緄使力人於坐上取之異曰我吳國忠臣有何罪乎乃拉殺之

晉齊王同惠帝時為大司馬以順陽人王豹為主簿同

驕縱失天下心豹致牋於罔詞甚切直罔令曰得前後白
事具意輒別思也會長沙王又至於罔案上見豹牋謂
罔曰小子離間骨肉何不銅駝下撲殺罔既不能嘉豹
之策遂納又言乃奏豹曰臣忿姦凶肆逆皇祚顛墜與
成都長沙新野共興義兵安復社稷唯欲戮力皇家與
親親宗室腹心從事此臣宿夜自誓無負神明而主簿
王豹比有白事敢告異端謂臣忝備宰相必遘危害慮
在一旦不祥之聲可躡足而待欲臣與成都分陝為伯

盡出藩王上誣聖朝鑒御之威下長妖惑疑阻衆心噶
啗背憎巧賣兩端訕上謗下讒內間外邁惡導奸坐生
猜嫌昔孔丘佐魯乃誅少正子產相鄭先戮鄧析誠以
交亂名實若趙高詭怪之類也豹為臣不忠不順不義
輒勅都街考竟以明邪正豹將死曰懸吾頭大司馬門
見兵之攻齊也衆庶寃之又奏殿中御史桓豹奏事不
先經同府郎考竟之於是朝廷側目海內失望矣

楚王瑋武帝子也初衛瓘為太保錄尚書事與汝南王

亮共輔朝政亮奏遣諸王還藩與朝臣廷議無敢應者
唯瓘贊其事瑋繇是憾焉賈后素怨瓘且忌其方直不
得騁已淫虐又聞瓘與瑋有隙遂謗瓘與亮欲為伊霍
之事啓惠帝作手詔使瑋免瓘等官黃門齎詔授瑋瑋
性輕險欲騁私怨夜使清河王遐收瓘左右疑遐矯詔
咸諫曰禮律刑名台輔大臣未有此比且請距之須自
表得報就戮未晚也瓘不從遂與子恒獄裔及孫等九
人同被害

趙王倫宣帝子也惠帝時諂事賈后裴頠甚惡之倫數
求官頠與張華復固執不許繇是深為倫所怨倫又日
懷篡逆欲先除朝望因廢賈后之際遂與華同被誅時
年三十四二子嵩該倫亦欲害之梁王彤東海王越稱
頠父秀有勲王室配食太廟不宜滅其後嗣故得不死
又解系為雍州刺史揚烈將軍西戎校尉會氏羌叛時
倫為征西將軍系與倫討之倫信用佞人孫秀與系爭
軍事更相表奏朝廷知系守正不撓而召倫還系表殺

秀以謝氏羌不從倫秀譖之系坐免官以白衣還第閉門自守及張華裴頠之被誅也倫秀以宿憾收系兄弟梁王彤救系倫怒曰我於水中見蟹且惡之况此人兄弟輕我耶此而可忍孰不可忍彤苦爭之不得遂害之并戮其妻子

河間王顥鎮關中皇甫重為秦州刺史重弟商為長沙王又參軍顥將李含先與商重有隙每銜之及此說顥曰商為人所任重終不為人用宜急除之以去一方之

患可表遷重為內職因其經長安乃執之重知其謀乃
露檄上尚書以顯信任李含將欲為亂召集隴上士衆
以討含為名又以兵革累興今始寧息表請遣使詔重
罷兵徵含為河南尹含既就徵重不奉詔顯遣金城太
守游楷隴西太守韓稚等四郡兵攻之成都王穎與顯
起兵共攻又以討后父尚書僕射羊玄之及商為名又
以商為左將軍河東太守領萬餘人於關門距張方為
方所斫顯軍遂進又既屢敗乃使商間行齎帝手詔使

游楷盡罷兵令重進軍討顯商行過長安至新平遇其從甥素憎商以告顯顯捕得商殺之又既敗重猶堅守閉塞外門城內莫知而四郡兵築土山攻城重輒以連弩射之所在為地窟以防外攻權變百端外軍不得近城將士為之死戰顯知不可拔乃上表求遣御史宣詔諭之令降重知非朝廷本意不奉詔獲御史騶人問曰我弟將兵來欲至未騶云已為河間王所害重失色立殺騶於是城內知無外救遂共殺重

東海王越惠帝幸長安河間王顥欲挾天子令諸侯越將起兵奉迎天子以太弟中庶子繆播父時故更委以心膂播從弟右衛率肩顥前妃之弟也越遣播肩詣長安說顥令奉帝還雒約與顥分陝為伯播肩素為顥所敬信既相見虛懷從之顥將張方自以罪重懼為誅首謂顥曰今據形勝之地國富兵強奉天子以號令誰敢不服顥惑方所謀猶豫不決方惡播肩為越游說陰欲殺之播等亦慮方為難不敢復言時越兵鋒甚盛顥深

憂之播肩乃復說顓急斬方以謝可不勞而安顓從之於是斬方以謝山東諸侯顓後悔之又以兵距越屢為越所敗帝反舊都播亦從太弟還雒契闊艱難深相親狎及太弟即帝位是為懷帝以播為給事黃門侍郎俄轉侍中徙中書令任遇日隆專管詔命時越威權自己帝力不能討心甚惡之以播肩等有公輔之量又盡忠故委以心膂越懼為己害因入朝以兵入宮執播等於帝側帝歎曰奸臣賊子無世無之不自我先不自我後

哀哉起執播等手涕泗歔歔不能自禁越遂害之朝野
憤惋咸曰善人國之紀也而加虐焉其能終乎及越薨
帝贈播衛尉祠以少牢

成都王穎既以陸機為將時宦人孟玖弟超並為穎所
嬖寵超領萬人為小都督未戰縱兵大掠機錄其主者
超將鐵騎百餘人直入機麾下奪之顧謂機曰貉奴能
作督不機司馬孫拯勸機殺之機不能用超宣言於眾
曰陸機將反又還書與玖言機持兩端軍不速決及戰

超不受機節度輕兵獨進而沒玟疑機殺之遂譖機於
穎言具有異志將軍王闡郝昌公師藩等皆玟所用與
牽秀等共證之穎大怒使秀密收機將害陸雲江統蔡
克力諫穎遲迴者三日盧志又曰昔趙王殺中護軍趙
凌赦其子驥驥詣明公而擊趙即前事也蔡克入至穎
前叩頭流血曰雲為孟玖所怨遠近莫不聞今果見殺
罪無彰驗將令群心疑惑竊為明公惜之僚屬隨克入
者數十人流涕固請穎惻然有宥雲色孟玖扶穎入催

令殺雲後東海王越討穎移檄天下亦以機雲兄弟枉
害罪狀

會稽世子元顯會稽王道子之子也車武子為吏部尚
書元顯有過武子與江績密言於道子將奏之事泄元
顯逼令自殺俄而武子卒朝廷傷之

梁武陵王紀僭號於蜀司馬王僧暉直兵參軍徐悺並
固諫紀以為貳於已皆殺之

後魏襲常山王素孫昭孝文時為殿中郎坐事停廢宣

武時昭從弟暉親寵用事稍遷左丞孝明即位于忠執政昭為黃門侍郎又曲事之忠專權擅威枉陷忠賢多昭所指導

唐齊王祐太宗第五子祐不率憲章屢為非法太宗以權萬紀為能轉齊王長史祐既暱近羣小畋遊無度萬紀驟諫不聽內懷憂憤乃條列祐罪因脇令表首祐懼而從之遣萬紀通表太宗遂厚賞萬紀而深責於祐萬紀還祐大怒曰長史賣我也勸我令首而自以為功必

且殺之快心耳會祐以萬紀奏而被遣羣小不逞因而扇祐遂加害焉韋文振性質重初以校尉從太宗征伐及祐出閣太宗以文振素在左右謹直選授祐府典軍祐令專典馬方欲寄心腹文振每事進諫祐所不納即語萬紀論之祐內深忿疾而外且任使及殺萬紀日文振懼縱轡馳走追行數里被箭不能復前因而遇害

禍敗

孽惟自作無可逭之理命或凶折亦威用之數載諸方

策昭然可見若乃居茂親之地膺夾輔之重邪僻中積
狂悖外恣或因緣間隙潛蓄以異謀或壞亂紀法卒成
於大憝乃有災祥豫見殃咎隨作亡身覆族貽誚終古
以至非辜告逝發憤自殞者咸用編次焉

漢梁懷王揖文帝少子也五年一朝凡再入朝因墮馬
死無子國除

梁孝王武景帝弟竇太后少子也栗太子廢太后心欲
以梁王為嗣袁盎等有所關說於景帝太后議格

格音閣

梁王怨袁盎謀陰使人刺殺袁盎帝繇此益疏王王歸國意忽忽不樂北獵梁山有獻牛足出背上孝王惡之六月中病熱六日薨

臨江王榮孝景之子也坐侵廟墺地為官帝徵榮榮行祖於江陵北門既上車軸折車廢江陵父老流涕竊言曰吾王不反矣榮至詣中尉府對簿中尉郅都簿責訊王王恐自殺

廣陵厲王胥武帝子也昭帝時見帝年少無子有覬欲

心而楚地巫鬼胥使下神祝詛及宣帝即位胥復使巫祝詛如前胥宮園中棗樹生十餘莖莖正赤葉白如素池水變赤魚死有鼠晝立舞王后廷中胥謂姬南等曰棗水魚鼠之怪甚可惡也居數月祝詛事發覺有司按驗胥惶恐以綬自絞

燕刺王旦武帝子也昭帝立旦遂招來郡國奸人賦斂銅鐵作甲兵數閱其車騎材官卒建旌旗鼓車旄頭先毆

與毆

同驅郎中侍從者著貂羽黃金附蟬皆號侍中令群臣皆

裝是時天雨虹下屬宮中飲井水水泉竭廁中豕群出
壞大官竈烏鵲鬪死鼠舞殿端門中殿上戸自閉不可
開天火燒城門大風壞宮城樓折拔樹木流星下墮后
姬以下皆恐王驚疾王客呂廣等知星為王言當有兵
圍城期在九月十月王愈憂恐天子使使者賜燕王璽
書旦得書即以綬自絞

東平煬王雲宣帝子東平思王之子也哀帝時無鹽危
山土自起覆草如馳道狀又鉅山石轉立雲及后謁自

之石所祭治石象瓠山立石東倍草并祠之

倍草黃倍草也

建

平三年息夫躬孫寵等共因幸臣董賢等告之是時哀

帝被疾多所惡事下有司逮王后謁下獄驗治言使巫

傅恭婢合歡等祠祭祀詛上為雲求為天子雲又與知

災異者高尚等指星宿言上疾必不愈雲當得天下石

立宣帝起之表也有司請誅王有詔廢徙房陵雲自殺

謁棄市

晉趙王倫僭即位親祠太廟遇大風飄折麾蓋時有雉

入殿中自太極東階上殿驅之更飛西鐘下有頃飛去
又倫於殿上得異鳥問皆不知名累日向夕宮西有素
衣小兒言是服劉烏倫使錄小兒并烏閉置牢室明日
開視戶如故並失人鳥所在倫目上有瘤時以為妖焉
後齊王冏河間王顥成都王穎起兵討倫倫軍敗惠帝
反正賜倫死

齊王冏為大司馬輔政長沙王又發兵攻冏府擒冏斬
於闔闔門外初冏之盛也有一婦人詣大司馬府求寄

產吏詰之婦人曰我截齊便去耳識者聞而惡之又謠曰著布袒腹為齊持服俄而同誅

長沙厲王又武帝第六子也齊王同專權又起兵相攻同敗斬之成都王穎遣刺客圖之又殺之又前後破穎軍斬獲六七萬人戰久糧乏城中大饑東海王越收又送金墉城穎爇而殺之初又執權之始雒下謠曰草木萌芽殺長沙又以正月二十五日廢二十七日死如謠言焉

南齊南郡王子夏武帝第二十三子初武帝夢金翅鳥
下殿庭搏食小龍無數乃飛上天明帝時其夢乃驗明
帝誅武帝諸子唯臨賀王子岳及弟六人在後帝每嘆
曰我及司徒諸兒子皆不長高武子孫日長大永泰元
年誅子岳等子夏最幼被誅時年七歲

始安王遙光太祖次兄始安貞王道生子也明帝建武
中進號撫軍將軍帝以親近單少憎忌高武子孫欲並
誅之遙光畫計叅議河東王鉉等七王見殺遙光意也東

昏即位遙光懼稱疾不復入臺先是遙光行還入城風飄儀繖出城外遙光慮見殺乃起兵戰不利還小齋帳中着衣恰坐秉燭自焰令人反拒齋閣皆重關左右並踰屋散出臺軍主劉國寶時當伯等先入遙光聞外兵至吹滅火扶匐下床軍人排閣入於閣中牽出斬首遙光未敗一日城中皆夢群蛇緣城四出各共說之咸以為異

後魏樂平王丕明元之子也後坐事以憂死丕之薨及

日者董道秀之死也高允遂著筮論曰昔明元末起白臺其高二十餘丈樂平王嘗夢登其上四望無所見王以問日者董道秀筮之曰大吉王默然有喜色後事發王遂憂死而道秀棄市

南安王楨為相州刺史孝文太和二十年五月至鄴入城日暴風大雨凍死者十餘人楨又以旱祈雨于羣神鄴城有石虎廟人奉祀之楨告虎神像云三日不雨當加鞭罰請雨不驗遂鞭像一百是月疽發背薨

北齊瑯琊王儼武成第三子也後主武平二年出儼居北宮五日一朝儼遂率京畿軍士三千人屯千秋門帝率宿衛至千秋門欲追殺之儼徒駭散帝拔儼帶刀環亂築儼頭良久乃釋之儼之未獲罪也鄴北城有白馬佛塔是石季龍為澄公所作儼將修之巫曰若動此浮圖北城失主不從破至第一級得白蛇長數丈回旋失之數旬而敗

廣武王長弼少名阿伽性麤武出入城市好毆擊行路

時人皆呼為阿伽郎君後為營州刺史在州無故自驚
走叛亡入突厥竟不知死所

隋齊王暕煬帝子也妃韋氏早卒暕遂與妃姊元氏婦
通遂產一女外人皆不得知陰引喬令則於第內酣宴
令則稱慶脫暕帽以為歡樂召相工令遍視後庭相工
指妃姊曰此產子者當為皇后王貴不可言時國無儲
嗣暕自謂次當得立又以元德太子有二子內常不安
陰挾左道為厭勝之事事既發帝大怒斬令則等數人

妃姊賜死，陳自是恩寵日衰。帝在江都宮元會，陳具法服將朝，無故有血從裳中而下。又坐齋中，見羣鼠數十至前而死，視皆無頭，尋為宇文化及亂兵所殺。

唐燕王忠高宗長子，為梁州都督，轉房州刺史。年漸長大，常恐不自安，或私衣婦人之服，以備刺客。又數有妖夢，常自占卜，事發廢為庶人。

梁友寧，太祖之姪也，為嶺南西道節度使。友寧督諸軍進逼營丘，月餘不能拔，與晉人戰于石樓。王師小却，友

寧旁自峻阜馳騎以赴敵所乘馬蹶而仆遂沒於陣友
寧將戰之前一日有大白蛇蟠於帳中友寧心惡之遇

害焉

冊府元龜卷二百九十九

欽定四庫全書

冊府元龜卷三百

宋 王欽若等 撰

外戚部

總序

夫帝王之臨御區宇賢戚並用莫不有外親之助焉故
后之父母列於三恪異姓伯叔紀於春秋築外館者異
其禮章褒元舅者垂於雅什母妻有黨所以叙於人
倫姻婭相謂于以垂於古訓而况席九五之勢當司牧

之重內既本乎敦叙外亦資其左右太史公稱秦以前
略矣靡得而紀焉漢氏之始非有功不侯中葉之後率
用推恩之典封爵之數優被外屬班固作表以志其事
東漢之世國紀數絕六后稱制委事父兄並居權要極
其貴寵鼎國典午洎乎南北以迄於五代莫不因緣宮
掖列居爵位其有總鈞樞之重握兵戎之政內侍帷幄
參預謀議外臨征鎮式遏方面命數崇大寄任隆異藉
親昵之要當倚屬之重富貴既極驕侈不期而自臻名

勢既雄中外嚮風而胥附其或躬明哲之美秉謙抑之
操深懷兢惕以戒乎泰盛動守清素以革乎侈心含忠
履潔特表乎純亮折節下士姑務於延納敦尚儒術擅
稽古之稱周旋諫諍厲匪躬之節以引翼為已任而薦
用賢能以雍睦治家庭而綏和宗黨望實兼著操行特
出以至內使寅亮之績而紀律用彰參議小大之務而
謀猷允協外宣保障之效而民夷是賴克揚威武之烈
而勲庸以立名在載籍事先表聽其或貪墨無已陸梁

自恣窮豪縱而無檢恃驕肆而弗恭殘賊忠賢懷蓄奸詐小則被譴讓之恥大則致夷滅之咎禍福之至召之惟人吉凶之報發乎所履豈謬也哉漢制以列侯尚公主魏晉之尚主者皆拜駙馬都尉歷代遵之其淑慝之跡咸附於此凡外戚部二十有三門

選尚

昔者堯以二女嬪于虞周以太姬配胡公蓋王姬之下嫁由古道也秦漢而降以選尚為重義取於承配勢極

於崇盛曷嘗不慎擇世胄參求雋望或舊勛之族隆象
賢之美或貴戚之懿篤因親之好自魏晉之後著之班
籍預國婚之選者悉加駙馬之拜爵品通貴榮寵兼極
自非履謙而思義共泰而處約者亦曷能克終而無咎
哉

漢張敖趙王耳子也耳薨敖嗣尚高祖長女魯元公主
周勝之絳侯勃子也尚文帝女

陳午堂邑侯嬰孫也尚文帝女館陶公主嫖

曹壽相國參之後嗣平陽侯尚景帝女陽信公主是為
平陽主後大將軍衛青既尊貴而壽有惡疾就國公主
問列侯誰賢者左右皆言大將軍主笑曰此出吾家常
騎從我奈何左右曰於今尊貴無比於是長公主風白

皇后皇后言之武帝乃詔青尚平陽主

平陽侯所尚
故稱平陽主

芒侯彫跖孫申尚孝景南宮公主元朔六年申坐與父
御婢姦罪自殺國除

林慮公主子昭平君尚武帝女夷安公主

金日磾本匈奴休屠王太子

磾音丁奚切休音許對切屠音諧

日磾以

父不降見殺與母闕氏弟倫俱沒入官輸黃門養馬時

年十四矣久之武帝遊宴見馬

方於宴遊之時而召閱諸馬

後宮滿

側日磾等數十人牽馬過殿下莫不竊視至日磾不敢
磾長八尺二寸容貌甚嚴馬又肥好帝異而問之具以
本狀對帝奇焉即日賜湯沐衣冠拜為馬監遷侍中駙
馬都尉光祿大夫日磾既親近未嘗有過失

薛宣為特進封高陽侯妻死而宣帝女敬武長公主寡

居成帝令宣尚焉

後漢李通素與光武相約結定謀議更始使通持節還鎮荊州通因娶光武女弟伯姬光武即位徵通為衛尉伯姬封寧平公主

鄧晨初娶光武姊元漢兵敗小長安元及三女皆遇害元後追封諡為新野節義公主

竇穆融長子也尚內黃公主穆代叔父友為城門校尉竇勳穆子也尚泚陽公主

竇固融弟友之子也尚光武女涅陽公主為黃門侍郎

梁松為太僕封延陵鄉侯尚光武女舞陽公主義王

松統

之子其傳云尚光武女舞陽公主又鄧訓傳舞
陰公主子梁苞有罪訓與交通此云舞陽誤矣

韓光為駙馬都尉尚光武女館陶公主紅夫

郭璜況子也為長樂少府封陽安侯尚光武涓陽公主

禮劉

陰豐新陽侯就子也尚光武酈公主綬

綬一作綬

馮柱魴子也為將作大匠封陽邑侯尚明帝獲嘉公主

姬

馮順勤子也為大鴻臚尚明帝平陽公主奴

耿襲弇弟舒之子也尚明帝隆慮公主迎

迎或作延

鄧乾震之子禹之孫也襲封高密侯尚明帝沁水公主
致

鄧蕃為侍中封昌安侯尚明帝平臯公主小姬

蕃禹之孫也

王度符子霸之孫也為黃門侍郎封軼侯尚明帝浚儀
公主仲

來稜為黃門侍郎征羌侯襲之世子也尚明帝武安公主惠

馮由為黃門侍郎尚章帝平邑公主玉

賈建為侍中襲封即墨侯參子膠東侯復之曾孫尚章帝臨頽公主利

班始尚順帝姑陰城公主

耿良奔玄孫一名無禁位至侍中尚濮陽公主

來定為虎賁中郎將即欽曾孫歷之子也尚安帝妹平

氏公主

鄧褒禹之玄孫為少府尚舞陰公主

耿援奔之孫為河陽太守尚桓帝妹長社公主

伏完湛五世孫為輔國將軍封不其侯尚順帝女陽安公主華

魏夏侯惇子楙歷位侍中尚書安西鎮東將軍尚太祖女清河公主楙在西時多畜伎妾公主與楙不和

何晏進之孫也晏母尹氏為太祖夫人晏長於官省尚

太祖女金鄉公主即晏同母妹

荀惲或之長子嗣亭侯官至虎賁中郎將尚太祖女安陽公主初文帝與平原侯植並有擬論文帝曲禮事或及或卒惲又與植善而與夏侯尚不穆文帝恨惲惲早卒子虓靈以外甥故猶寵待

蜀諸葛喬亮兄瑾之第二子也亮以喬為己適子拜駙馬都尉又亮子瞻年十七尚公主拜駙馬都尉

吳周循瑜之子大帝步夫人生二女長曰魯班字大虎

次曰魯育字小虎循尚魯班循卒後配衛將軍全琮

朱據為建義都尉黃龍元年遷都建業徵據尚公主魯

育拜左將軍封雲陽侯主後配劉纂

吳歷曰纂先尚大帝中女早卒又以

小虎為繼室

顧邵雍之長子博覽書傳好樂人倫風聲流聞遠近稱之大帝妻以策女

朱治子紀大帝以策女妻之以校尉領兵

朱宣據孫也襲爵雲陽侯尚公主為驃騎將軍

陸景抗子也尚毗陵侯公主皓之適妹拜騎都尉

滕胤少有節操美儀容弱冠尚公主

晉任愷少有識量尚魏明帝女齊長公主

杜預尚武帝妹高陸公主起家拜尚書郎

衛宣司空瓘之第四子也武帝勅宣尚繁昌公主瓘自以諸生之胄婚對微素抗表固辭不許

王濟渾之子有當世名尚常山公主年二十起家拜中

書郎

華恒表孫也博學以清素為稱尚武帝女滎陽長公主

拜駙馬都尉

臣欽若等曰駙馬都尉漢武帝置掌駙馬駙副也非正駕事皆為副馬多以宗室外

戚為之至晉乃專

拜尚公主者也

王粹濟之孫武帝詔粹尚潁川公主粹至拜潁川太守

盧湛清敏有思理好老莊善屬文選尚武帝女滎陽公

主拜駙馬都尉未成禮而公主卒

孫會秀之子年二十為射聲校尉尚惠帝女河東公主

會形貌短陋初與富室兒於城西牧馬百姓忽聞其尚

主莫不駭愕

王敦字處仲少有奇人之目尚武帝女襄城公主拜駙馬都尉

傅宣祗子也尚弘農公主為御史中丞卒

羊賁舅子也尚明帝女南郡公主除秘書郎卒

荀羨崧之子年十五將尚尋陽公主羨不欲連婚帝室仍遠遁去監司追不已乃出尚主拜駙馬都尉

桓溫字元子豪爽有風槩姿貌甚偉選尚南康長公主

拜駙馬都尉

王獻之字子敬起家州主簿秘書郎轉丞以選尚新安公主

劉惔字真長尚明帝女廬陵公主

謝混少有才譽善屬文孝武帝為晉陵公主求壻謂王
珣曰主壻但如劉真長王子敬便足如王處仲桓元子
誠可才小富貴便豫人家事珣對曰謝混雖不及真長
不減子敬帝曰此便足混竟尚主

宋王偃父嘏尚晉孝武帝女鄱陽公主偃尚高祖第二女吳興長公主

王藻位東陽太守尚文帝第六女臨川長公主英媛何瑀尚武帝少女豫章公主

謝緯述之第三子尚文帝第五女長城公主

趙倩尚武帝第四女海鹽公主

褚寂之叔度第二子為著作佐郎尚文帝第六女瑯琊公主

徐達之美之子也尚高祖長女會稽公主達之子湛之
永初三年亦尚公主

徐喬之美之子也為竟陵王文學尚高祖第六女富陽
公主

徐孝嗣湛之孫也八歲襲爵枝江縣公孝武甚愛之詔
尚帝女康樂公主

王僧綽弘弟曇首之子年十三文帝引見下拜便流涕
哽噎帝亦悲不自勝襲封豫章縣侯尚文帝長女東陽

獻公主

江恁湛之子尚文帝第九女淮陽長公主拜駙馬都尉
江敷恁之子恁為文帝所殺敷幼以戚屬召見孝武謂
謝莊曰此兒方當為名器少有美譽桂陽王休範臨州
辟迎主簿不就尚孝武女臨汝公主拜駙馬都尉

南齊褚湛之仕宋尚高祖第七女始安哀公主拜駙馬
都尉著作郎哀公主薨復尚高祖第五女吳郡宣公主
湛之子淵復尚南郡公主姑姪二世相繼拜駙馬都尉

何戢偃之子偃之被遇於武帝選戢尚山陰公主拜駙馬都尉

徐演孝嗣長子尚武帝女武康公主

梁王志司空僧虔之子弱冠選尚孝武帝女安固公主拜駙馬都尉

王亮父攸宋給事黃門侍郎亮以名家子宋末選尚公主拜駙馬都尉秘書郎

王瑩光祿大夫懋之子選尚宋臨淮公主拜駙馬都尉

何敬容以名家子弱冠選尚武帝女長城公主拜駙馬都尉
謝覽耻弟濬之子也選尚錢唐公主拜駙馬都尉

王暕齊太尉儉之子年數歲而風神警拔弱冠選尚淮
南長公主拜駙馬都尉

殷均父叡為齊鎮北長史武帝與叡少舊故以女妻均
即永興公主也天監初拜駙馬都尉

謝謨齊吏部郎朏之子尚武帝女永世公主

王實丹陽尹王榮少子尚武帝女安吉公主

王琳侍中份之子為南平王文學尚義興公主拜駙馬
都尉

王銓琳之子美風儀尚占鑿尚武帝女永嘉公主拜駙
馬都尉

王茂璋為給事黃門侍郎尚武帝妹新安公主
王溥銓之子尚簡文女餘姚公主

張希領軍續之子選尚簡文第九女海鹽公主

張交侍中綰之子頗涉文學選尚簡文第十一女定陽

公主

袁憲簡文以憲貴遊公子尚帝女南沙公主

柳偃吳興太守憚之子年十一詔尚長城公主拜駙馬
都尉

後梁蔡延壽侍中尚書令大寶子有識博涉經籍尤善
當世之務尚宣帝女宣城公主歷中書郎尚書右丞

王泛侍中錫之子少有令譽尚宣帝妹廬陵長公主歷
秘書郎太子舍人宣城王友廬陵長史帝踐位授侍中

吏部尚書

陳侯淨藏瑱之子尚世祖第二女富陽公主以公主除
員外散騎常侍

錢藏為陳留太守尚高祖長女永世公主

柳盼偃之子尚文帝女富陽公主拜駙馬都尉

沈君理美風儀博涉有識鑒武帝鎮南徐州深見器重
命尚會稽長公主

蔡凝為太子舍人以名公選尚信儀公主拜駙馬都尉

到郁仲舉之子尚文帝妹信儀公主郁官至中書侍郎
後魏賀紇始有勲於國尚平文女父野干尚昭成女遼

西公主

穆觀太尉侍中崇之子明元時綰門下中書出納詔命
未嘗有所遺漏帝奇之尚宜陽公主拜駙馬都尉

穆壽觀之子少以父任選侍東宮尚樂陵公主拜駙馬
都尉

穆平國壽之子襲爵尚城陽長公主拜駙馬都尉

穆正國平國之弟尚長樂公主拜駙馬都尉

穆伏干平國之子伏干襲爵尚濟北公主拜駙馬都尉
穆罷伏干之弟伏干卒無子罷襲爵尚新平長公主拜
駙馬都尉

穆亮罷弟早有風度獻文時起家為侍御中散尚中山
長公主拜駙馬都尉

穆紹亮之子孝文以其貴臣世胄顧念之九歲除員外
郎侍學東宮轉太子舍人十一尚瑯琊長公主拜駙馬

都尉

穆真太尉侍中崇之少子起家中散轉侍東宮尚長城
公主拜駙馬都尉後勅離婚納文明太后姊尋除南部
尚書

穆泰真之子孝文時以功臣子孫尚章武長公主拜駙
馬都尉典羽獵四曹事賜爵馮翊侯

穆伯智泰之子八歲侍學東宮十歲拜太子洗馬散騎
侍郎尚饒陽公主拜駙馬都尉

姚黃眉興之子太宗昭哀皇后之弟姚泓滅黃眉間來歸國帝厚禮待之賜爵隴西公尚陽翟公主拜駙馬都尉賜隸戶三百

杜超字祖仁密皇后之兄少有節操泰常中為湘州別駕奉使京師時以法禁不得與后通問始光中太武思念舅氏以超為陽平公尚南安長公主拜駙馬都尉

李蓋中山人為左將軍南郡公初太武姊武威長公主故涼王沮渠牧犍之妻平涼州頗以公主通密計助之

故寵遇差隆詔蓋尚馬

馮熙文明太后之兄為冠軍將軍肥如侯尚恭宗女博陵長公主拜駙馬都尉

萬振尚高陽長公主拜駙馬都尉遷散騎常侍寧西將軍長安鎮將賜爵馮翊公

振子安國少明敏有姿貌以國甥復尚河南公主拜駙馬都尉遷散騎常侍

陸昕之字慶始風望端雅尚獻文女常山公主拜駙馬

都尉

盧道裕字寧祖秘書監淵子少以學尚知名風儀兼美尚獻文女樂浪長公主拜駙馬都尉太子舍人

薛拔獻文時除散騎常侍尚西河長公主拜駙馬都尉
盧道虔字慶祖秘書監淵子粗闇經史兼通美術尚孝
文女濟南長公主

劉昶宋文帝之子前廢帝子業立昶懼禍奔魏尚武邑
公主拜侍中征南將軍駙馬都尉封丹陽王歲餘而公

主薨更尚建興長公主又薨又尚平陽長公主

劉承緒昶之子公主所生而尪疾尚孝文妹彭城長公主為駙馬都尉

馮誕熙之子與孝文同歲幼侍書學仍蒙親待尚帝妹樂安長公主拜駙馬都尉侍中征西大將軍南平王

馮穆誕之子尚孝文女順陽長公主拜駙馬都尉歷負外通直散騎常侍

司馬楚之晉宣帝弟馘八世孫晉末來奔尚河內公主

司馬躍楚之子尚趙郡公主拜駙馬都尉

司馬肫豫州刺史悅之子尚宣武妹華陽公主拜駙馬
都尉特除負外散騎常侍

蕭寶明齊明帝之子齊亡來奔宣武禮之甚重尚南陽
長公主賜帛一千疋并給禮具

高肇文昭皇太后之兄為尚書左僕射冀州大中正尚
宣武姑高平公主遷尚書令

高猛肇兄琨之子尚宣武母妹長樂公主拜駙馬都尉

王肅以尚書令輔政宣武詔肅尚陳留長公主

李彧侍中太傅延實之子尚莊帝妹豐亭公主封東平

郡公位至侍中

蕭贊齊東昏侯寶卷之子建義初隨爾朱榮赴晉陽莊
帝徵贊還洛轉司徒遷太尉尚帝姊壽陽長公主

邢昕之風望端雅尚常山公主拜駙馬都尉

宿石為中壘將軍從元明帝獵帝欲親射虎石扣馬諫
引帝上原上後虎騰躍殺人詔石為忠臣切諫免虎之

害賜馬一疋尚上谷公主

劉輝尚蘭陵長公主

胡祥國珍子也尚清河王懌女長安縣主祥歷殿中尚

書中書監

北齊崔暹為太常卿初文宣親作書與暹曰賢子達挈
其有才學亡兄女樂安主魏帝外甥內外敬待勝朕諸
妹思成大兄宿志乃以主降達挈

斛律武都金之孫也金為太師文宣幸其第謂金曰公

元勳佐命父子忠誠朕當結以婚姻永為藩衛乃詔武
都尚義寧公主

潘晃河東郡王樂之子諸將子弟率多驕縱晃沉密謹
慤以清靖自居尚公主拜駙馬都尉

段懿左丞相韶之長子有姿儀解音樂又善騎射天保
初尚潁川長公主累遷行臺右僕射兼殿中尚書

段深韶第二子美容貌寬謹有父風大寧二年詔尚永
昌公主未婚公主卒清河三年又詔尚東安公主

寶鼎懿之子尚中山公主武平末遷儀同三司

司馬消難太尉子如之子尚高祖女以主壻貴公子頗
歷中書黃門郎光祿少卿

可朱渾天和尚東平長公主賜爵宜安鄉男文宣受禪
加駙馬都尉位開府儀同三司封成臯郡公

後周尉遲俊夔性寬裕有鑒識尚太祖妹昌樂大長公
主

宇文測太祖族子初仕魏為司徒右長史安東將軍尚

宣武女陽平公主拜駙馬都尉

韋世康孝寬兄之子孝寬初仕魏為驃騎大將軍長子
諶年方十歲魏文帝欲以女妻之寬辭以兄子世康年
長帝嘉之遂以妻世康

尉遲迴為太祖大丞相帳內都督尚魏文帝女金明公
主拜駙馬都尉

李基字仲和幼有聲譽美容儀善談論涉獵羣書尤工
騎射太祖召見奇之乃令尚義歸公主

史雄字世武大將軍寧之子少勇敢膂力過人便弓馬
有美略年十四從寧於牽毛山奉迎太祖仍從較獵弓
無虛發太祖歎異之尋尚太祖女永富公主除使持節
驃騎大將軍開府儀同三司

于翼字文若大師燕公謹之子美風儀有識度年十一
尚太祖女平原公主拜負外散騎常侍封安平縣公
鄭譯武帝時為左侍上士既喪妻帝命譯尚梁國公主
及帝親揔萬機授以御正下大夫

王褒美風儀善談笑博覽史傳尤工屬文梁武帝嘉其
才藝遂以弟鄱陽王恢之女妻之

李敏穆之孫也初周宣帝女娥英其母隋文女樂平公
主也入隋開皇初為娥英妙擇婚對勅貴公子弟集弘
聖宮者日以數百公主選取敏禮儀如尚帝女後將侍
宴公主謂敏曰我以天下與至尊唯一女夫當為汝求
柱國若授餘官慎無謝及進見帝親御琵琶遣敏歌舞
帝大悅謂公主曰敏何官對曰一白丁耳謂敏今授儀

同敏不答帝曰不滿爾意邪令受開府又不謝帝曰公
主有大功於我何向其女壻惜官今授卿柱國敏乃拜
而蹈舞遂於坐發詔柱國以李官宿衛

閻毗上柱國慶之子七歲襲封石保縣公及長儀貌矜
嚴頗好經史受漢書於蕭該略通大旨能篆書工草隸
尤善畫為當時之妙武帝見而悅之命尚清都公主

隋李禮成初為周民部中大夫妻竇氏早沒知高祖有
非常之表遂聘高祖妹為繼室情契甚歡及高祖為丞

相進位上大將軍遷司武上大夫委以心膂

王奉孝為儀同尚高祖第五女蘭陵公主主美姿儀性
婉順好讀書帝於諸女中特所鍾愛奉孝卒適親衛河
東柳述初開皇中韋鼎尤善相術為上儀同時公主寡
帝為之求夫選述及蕭瑒等以示韋鼎鼎曰瑒當封侯
而無貴妻之相述亦通顯而守位不終帝曰位繇我耳
遂以主降述

宇文靜禮文慶之子也初為太子千牛備身尋尚高祖

女廣平公主授儀同安德縣公

宇文士及封許國公尚煬帝長女南陽公主美姿儀有志節造次必以禮下降年十四以謹肅聞

竇抗雒州總管陳國公榮之子尚文帝女萬安公主抗釋褐千牛備身儀同三司襲爵陳國公

唐馮少師尚高祖女長沙公主

竇誕抗第三子尚高祖女襄陽公主

柴紹尚高祖第三女平陽公主

長孫孝政尚高祖女高密公主

後降
段編

趙慈景蕃州總管納之子也幼有姿儀美風調高祖潛
龍時見而悅之妻以桂陽公主及長有文武才幹好結
交座客常滿接對忘疲弱冠得美名於京邑高祖於諸
壻中特所親愛

揚師道隋末歸國武德元年至京詔授上儀同為備身

左右選尚桂陽公主封安德縣公

公主先降趙慈景後
降師道又封長廣公

主

豆盧懷讓尚高祖女萬春公主

一云長沙公主封萬春

執失思力突厥之酋長也入朝尚高祖女九江公主

喬師望尚高祖女廬陵公主

蘇勗尚高祖女南康公主

楊思敬師道兄子尚高祖女安平公主

封言道倫之子尚高祖女淮南公主

竇奉節軌之子尚高祖女房陵公主

後降賀蘭僧伽始封永嘉

崔恭禮尚高祖女真定公主

阿史那社爾突厥處羅可汗子尚高祖女衡陽公主

薛萬徹尚高祖女丹陽公主

裴律師寂之子尚高祖女臨海公主

崔宣慶尚高祖女館陶公主

溫挺彥博次子尚高祖女安定公主

後降鄭敬玄

趙瓌尚高祖女常樂公主

蕭銳宋國公瑀之子尚太宗女襄城公主

王敬直珪之少子尚太宗女南平公主

後降劉玄意

竇遠靜之子尚太宗女遂安公主

後降王
大禮

長孫冲無忌之子尚太宗女長樂公主

唐善識儉之子尚太宗女豫章公主

柴令武紹之子尚太宗女巴陵公主

史仁表尚太宗女普安公主

高履行儉之子尚太宗女東陽公主

周道務尚太宗女臨川公主

程處亮知節子也尚太宗女清河公主

韋思安尚太宗女晉安公主

後降揚
仁輅

獨孤謀尚太宗女安康公主

長孫曦尚太宗女新興公主

杜荷如晦之子尚太宗女城陽公主

後降
薛瓘

房遺愛玄齡次子尚太宗女高陽公主

長孫詮尚太宗女新城公主

後降章
正矩

權毅尚高宗女義陽公主

王勗尚高宗女高安公主

薛紹尚高宗少女鎮國太平公主後紹被誣誅死武后乃殺武攸暨之妻以配主焉

武延暉尚中宗女新都公主

裴巽尚中宗女宣城公主

王同皎尚中宗女定安公主

後降韋濯
又降崔銳

楊慎交恭仁之孫也尚中宗女長寧公主

後降蘇
彥伯

韋鐵尚中宗女永壽公主

武延基承嗣之子也尚中宗女永泰公主

武崇訓承嗣從祖弟也尚中宗女安樂公主

後降承嗣
第二子延

秀

韋捷尚中宗女成安公主

崔真尚睿宗女壽昌公主

王承慶尚睿宗女淮陽公主

鄭萬均尚睿宗女代國公主

薛伯陽稷之子尚睿宗女涼國公主

始封
仙源

王守一尚睿宗女薛國公主

始封
清陽

薛儆尚睿宗女鄖國公主

後降鄭孝義

裴虛已尚睿宗女霍國公主

王繇尚玄宗女永穆公主

張去奢尚玄宗女常芬公主

一云降張去盈

薛譚尚玄宗第六女常山公主

後降竇澤

薛鏞尚玄宗第四女唐昌公主

張洵尚玄宗女寧親公主

始封興信公主

蕭衡中書令嵩少子尚玄宗女新昌公主嵩夫人賀氏

入覲拜席玄宗呼為親家母禮儀甚盛

崔惠童尚玄宗女高都公主

郭潛曜尚玄宗女臨晉公主

豆盧建尚玄宗女建平公主

後降楊悅

源清尚玄宗女真陽公主

後降蘇震

獨孤明尚玄宗女信成公主

吳澄江尚玄宗女壽春公主後入道封楚國公主

竇鏐尚玄宗女昌樂公主

裴齊丘尚玄宗女永寧公主

溫西華尚玄宗女平昌公主

後降陽徽
改封宋國

楊錡尚玄宗女太華公主

裴穎尚玄宗女興信公主

始降張洎次降穎又
降揚敷改封齊國

郭液尚玄宗女壽光公主

薛履謙尚玄宗女樂城公主

一云降
薛倉

裴玲尚玄宗女新平公主

後降姜
慶初

程昌胤尚玄宗第二十六女廣寧公主

後降蘇恬一
云蘇克貞

楊洄尚玄宗女咸宜公主

後降
崔嵩

楊朏國忠之子尚玄宗第二十八女萬春公主朏以父

罪伏誅

後降
楊錡

豆盧謨尚肅宗第七女長樂公主

一云獨
孤濁

鄭異尚肅宗女寧國公主

後降回紇可汗
三降薛康衡

柳潭尚肅宗女和政公主

裴清尚肅宗女太寧公主

一云適
張靖

鄭沛尚肅宗女宜寧公主

又封
紀國

王詮尚肅宗女永和公主

裴徽尚肅宗女延光公主

後降肅升
封部國

裴倣尚代宗女永清公主命有司於光順門行冊禮

郭曖尚父子也尚代宗女昇平公主命有司於光順門
行冊禮

田華為檢校比部郎中尚代宗女新都公主華即悅從
父兄也帝以先朝許華婚不敢以悅故而違罷

裴液為太常卿尚代宗女晉陽公主

一云
裴隨

柳杲為秘書少監尚代宗女義清公主

竇克良為光祿少卿尚代宗女壽昌公主

沈明為贊善大夫授衛尉少卿同正尚代宗女長林公

主

王贊為同州朝邑尉授光祿少卿同正尚代宗女新都

公主

後降
田華

張昭以前太子通事舍人授衛尉少卿同正駙馬都尉

尚代宗女寧晉公主

高怡尚代宗女嘉豐公主

田緒尚代宗女嘉誠公主

初封武清公主

吳士廣尚代宗女普寧公主

張茂宗安武軍節度孝忠子以秘書郎授光祿少卿駙

馬都尉尚德宗女義章公主孝忠令其妻鄧國夫人谷

氏來覲且就禮帝嘉之賞賚甚厚

一云義興公主

王士平為秘書少監尚德宗女義陽公主士平武俊之子也帝慎重其事先特令宰相訪儒者禮官參定其見

舅姑之禮又以武俊在鎮仍定公主遣使之儀

柳昱為舒王府司馬授殿中少監同正駙馬都尉尚德
宗女宜都公主

薛釗以前興平縣尉授秘書少監同正駙馬都尉尚德
宗第六女臨真公主

崔諲以前涇陽縣尉授檢校殿中少監駙馬都尉尚德
宗女永陽公主

郭縱穆宗之叔舅汾陽王孫也順宗居東宮長女德陽

郡主為德宗所鍾念是時鏜母昇平長公主恩禮降厚
又異諸主故選鏜以德陽降焉皆未及笄冠之歲主後
進號是為漢陽公主

鄭何尚順宗女普安公主

崔杞尚順宗女東陽公主

沈暈尚順宗女西河公主

劉士涇尚順宗女雲安公主

張克禮尚順宗女襄陽公主

王承系尚順宗女陽安公主

于季安頤之子尚憲宗女普寧公主

韋讓尚憲宗女汾陽公主

沈議尚憲宗女宣城公主

沈汾尚憲宗女南康公主

劉弘景尚憲宗女永順公主

劉異尚憲宗女安平公主

裴損為太子舍人授銀青光祿大夫太子諭德駙馬都

尉尚憲宗女陳留公主

杜悰為太子司議郎授銀青光祿大夫行殿中少監駙馬都尉尚憲宗女岐陽公主悰故司徒佑之孫岐陽帝長女正妃之出舊制選尚多於貴戚或武臣節將之子于時獨孤郁為翰林學士未幾屬權德輿入相郁以德輿子壻親嫌請出帝意重學士不得已許之出脩史且歎德輿之有良壻遂命宰臣於卿士家選駙馬文雅名士居清列者初於文學後進間選擇皆稱疾不願次及

貴胄悖遂應選

杜中立授銀青光祿大夫檢校光祿少卿駙馬都尉尚
憲宗女真源長公主

王元達為成德軍節度使尚憲宗女壽安公主元達遣
姑段氏進食一千盤并進御衣鞍馬及公主衣資粧奩
私其身女口等令中使宣授召王氏諸親對訖賜食并
錦綵銀器有差

衛洙尚憲宗女臨真公主檢校秘書少監駙馬都尉尋

除左拾遺先是帝詔宰臣於名家以文學進身者擇都尉故特越舊制授洙諫官以寵之

薛翊為著作佐郎尚憲宗女真寧公主授銀青光祿大夫檢校秘書少監駙馬都尉

郭仲詞為太子舍人尚穆宗女饒陽公主授銀青光祿大夫檢校殿中少監駙馬都尉

一云郭仲家

郭仲恭為詹事府丞尚穆宗女金堂公主授銀青光祿

大夫檢校衛尉少卿駙馬都尉

公主初封晉陵

韋處仁尚穆宗女義豐公主

柳正元尚穆宗女淮陽公主

竇幹尚穆宗女延安公主

鄭顥尚宣宗女萬壽公主

于琮休烈之孫尚宣宗女廣德公主

韋保衡為右拾遺尚懿宗同昌公主授銀青光祿大夫
起居郎駙馬都尉出降之日禮儀甚盛

梁羅廷規紹威長子尚太祖長女安陽公主授司農卿

駙馬都尉又尚金華公主

趙巖忠武軍節度彘之子尚太祖女長樂公主

王昭祚尚太祖女普安公主

後唐孟知祥自幼溫厚知書樂善武皇深器之以其弟克讓之女妻之明宗即位封瓊華公主

任團父茂弘避地太原奏授河西令有子五人曰圖曰團團圜風彩俱異武皇愛之以宗女妻團歷代憲二即
刺史

張某尚武皇女瑤英長公主

臣欽若等曰
史失其名


晉高祖微時唐明宗時為代州刺史每深心器之妻以
愛女則武憲曹后之生也明帝既即位封永寧公主清
泰中高祖鎮太原既封晉國長公主

趙延壽尚明宗女興平公主

杜重威父堆金唐武皇先鋒使也重威少事明宗晉高
祖妻以妹累封宋國大長公主

晉楊承祚光遠子也尚高祖長女長安公主

羅周敬初在梁為許州節度使徵授秘書中監駙馬都尉尚普公主



冊府元龜卷三百